

四庫全書

集部

欽定四庫全書

明文衡卷二十

明程敏政編

頌

節婦黃氏旌門頌

并序

蘇伯衡

姑蘇吳縣之閭門里有旌門焉朝廷所以寵褒姚節婦者也節婦姓黃氏名妙清歸姚氏為諱榮之妻生男女各一人而榮以病卒榮卒時節婦年二十有九

子文聰纔二歲貧甚力紡績以俯育或勸其更嫁節婦曰夫死不嫁婦人之常況有子可從何為而更嫁此足一移我則匪人不聽後十二年張士誠入據姑蘇亂兵掠文聰以去數從人問消息比二年不聞問或曰異日者有子可無更嫁也今子得矣無論死藉令生歸亦不可望不嫁將焉恃乎節婦曰我豈以子存子亡為去留者哉終不聽又四年文聰始脫身來歸節婦驚喜且泣曰姚氏有後矣我死亦無憾後八

年里耆列其狀上于縣若府監察御史為蒼實以聞
制下旌其門為節婦之門則洪武七年春三月也今
節婦嫠居且三十四年年已六十有三文聰愚無以
侈上賜而昭示罔極聞伯衡嘗遵屬太史氏介朱恪
即金華山中求書其事勒諸樂石伯衡惟唐虞三代
之世其教既明其化既成其民俗之美至於比屋可
封當是之時旌其門閭表厥宅里猶不敢緩然則所
謂樹之風聲使民益勸於善雖唐虞三代之聖人猶

不能不以之為務也況當世降俗漓之後有天下者
不善其善以為勸奚可哉皇帝受天景命君臨萬邦
凡有係於風化者輒加表異蓋以此也而姚崇妻黃
以貞節著聞蒙被寵褒如此是猶唐虞三代之民加
唐虞三代之令典矣遠近聞之其誰不感慕而興起
此所謂賞一而勸百者也不其休哉不其休哉夫推
明聖意而播諸聲詩者史氏之職也因不辭而為之
頌頌曰

天眷聖神民君民師匪曰治民亦欲迪之聖神奉天式
和民則陰握化權作新萬國褒嘉節義錫以旌書風行
而表孰不聿趨非有館鑄自率規矩四維既張五倫攸
叙吳縣有婦姚妻氏黃年二十九良人遽亡儲無儋石
室若懸罄母子熒熒相依為命霜風淒其落月照
帷間關機杼影與形隨人或憐之勸之他適胡乃茹荼
有聲如蜜慷慨自誓辭與涕俱可以人焉而大疑如我
不即死我志靡他我下從夫我子何如子未成童掠於

亂兵倚閭而望寒暑再更僉曰已矣安知非死無子焉
恃不嫁奚俟婦曰咈哉何言之卑我志可易太山可隳
我志不易仰天一慟血淚雨集時既寧謚子亦生還雖
無甘旨志養攸全郡守御史交謂宜褒乃具封章乃請
于朝乃被綸音旌其閭里苦節之報廢其在是昔視其
門門則以席今過其門門有綽楔綽楔巍巍龍光有
耀匪爾之私俾世視傲嗟臣事君猶婦從夫凡百在位
曷鑒曷圖婦道不虧尚稱聖意臣節殫竭有不寵

異刻辭堅珉以昭鴻恩以揚清芬以詔後昆

平雲南頌

王景

聖天子之御大厯服也維清緝熙載敷武功盪攘羣
雄混一函宇於是偃武修文與民休息垂十餘年
皇帝若曰元綱解紐土宇瓜分朕奮起淮甸鏖戰鄱
陽江漢以清捲甲長驅遂定中夏元君北跳秦晉吳
蜀所向風靡不十年而成大業雖天命有歸皆師武
臣之畧也維雲南一隅獨沮聲教卿謂何如僉曰雲

南塹山墉壑狼子野心聚螫挺獸況已咱爾幹爾密
為元臣子罔知天命宜其無嚮化心若以天兵臨之
彼惡能敵帝曰俞哉乃命潁川侯臣傅某西平侯臣
沐某永昌侯臣藍某將鷹揚虎校之士三十餘萬
聲罪致討樓船蔽江旌旗亘天星流電邁分道並進
大軍繇貴廣軼普定下牂柯深踐不毛奇軍繇羅
佐關擊烏撒攻可渡河大會于曲靖疾若風雨所向
克捷元兵蜂屯蟻聚毋敢抗我師者先是下令曰

若至曲靖便可輕騎長驅未至十里許大霧霧元司
徒達爾瑪拒烏白江為陣未成列我師涉水以濟徑
前奮擊其陣遂亂達爾瑪陷于淖生擒之殺將士
若干人元兵大奔遂分兵逆可渡河望風席卷梁王
巴咱爾幹爾密棄城遁至晉寧率妻子死之雲南平
自出師至是凡百餘日得府州若干戶若干馬牛軍
實無筭三帥承制建官大軍鎮焉遂下大理拔金齒
凡雲南故壤皆郡縣矣明年遣使降車里降緬降八

百咸以壤奠貢洪惟天兵不決十辰拓地萬里西南
諸夷悉臣悉妾何成功之速哉蓋天子文武神聖徯
來望切而有三帥善長駕遠馭也上自漢唐以迄于
元羈縻而已乃今與內地等功高千古信乎王者之
無外也又明年班師振旅獻俘授誠定功行賞封傳
某為潁國公諸將以下進爵有差嗚呼古之有盛德
大功必形諸歌頌皇風興大雅作草茅微臣不敢多
讓謹稽首頓首而為頌曰

皇明御天統有萬方際天蟠穹武功煌煌三光耀靈海
宇聿清叶氣嘉生蒸為太平蠢茲蠻方稔藏奸凶恒恒
穰穰以褻天常乾坤之量海嶽是包彼昏而狂誕敢叫
呶皇赫斯怒爰整元戎吉日載戒車攻馬同於鑠王師
赫赫桓桓天討是將震懾百蠻兵無留行勢若雷霆日
星晦霧江海沸騰鷹揚曲靖俘彼勁兵征虜所指載揚
天聲戰不貪殺殺不却降斥原䟽旆以迄用康大憝肆
逋筐玄篚黃拓禹之跡維周職方表方建官棋布星分

仡仡大城以奠其民滇外諸蠻厥誠以輸昔也狹獮今
為騶虞載駟載伐戈鋌不腥南金象齒罔敢弗庭凡此
南功三帥僉同維一乃心上毗帝聰大烈之龐超漢軼
唐風雲胥慶天地開張會朝清明聖化基之萬國一統
坐而釐之草茅微臣作此頌焉武功告成

四裔咸賓詩

有序

解縉

皇帝臨大寶之明年紀元永樂嘉與萬方共躋仁壽
一德感孚休祥昭應民安物阜四裔畢來東若朝鮮

日本暹羅東南若琉球中山南北有安南占城西南
海東洋爪哇鬼方緬國木邦孟定麓川威遠八百老
撾車里西若烏斯尼喀巴拉西北輝和爾匈奴哈密
遠者數萬朝聞夕引奉貢儀物皆至京師其文辭稱
述盛德對揚鴻休誠服心悅發見于外殊音重譯異
服奇詭懽忻攸同嚮慕無已庶衆聚觀天下忭喜咸
相謂聖神光被如日月之照臨天行雨施妙運莫測
垂裳拱手於穆清而有生之類盛利見于四方萬里

之遠鼓舞輻輳而歸之來享來王而不能已吾民何
幸而臻茲嘉會實萬世一時也朝之羣臣亦咸相謂
虞舜有三苗之征周公有戎狄之膺宣王逐獫狁而
秦漢及隋疲弊中國力夫之爭無時或寧唐宋否極
上天厭罪命我太祖聖神文武欽明啟運俊德成功
統天大孝高皇帝起而定之不令而從不言而化八
表同風四十餘年皇帝以聖繼聖比隆唐虞殊方歸
命者接迹而至宜有詩歌垂之頌聲軼遠古而過之

又咸謂臣縉宜為義不可辭則合羣臣百姓之言從容奏寫皇帝曰咨周家九夷通道太保進旅獒之訓虞廷千羽既舞伯益有儆戒之箴故愚者常以小康肆志賢者不以外物動心朕方兢業於初服是何足云頌聲其為作君臣相飭之歌以繼虞周之治臣縉竊謂自古頌美而寓規諫皆臣子摠誠委曲之小心臣愚不及此乃自皇上發之是誠萬世一時也謹拜手稽首而獻詩曰

皇帝明德與天同運華夏奠安四夷効順限山阻海風
氣不通不招不約奔走來同梯陟峻阪航涉濤瀾
溽暑赤雪玄霜殊形奇醜異服紛厖鬚髮焦赤睽眴深
黃猩唇猥喙黎面文身袒跣椎結皮裳卉巾離披落索
搖曳縈纏鞮屨殊音侏離禽言呶呶重譯舍館授餐窮
物式陳兼金玉瓚齒革羽毛服食器用皇帝儉勤異物
非重厚往薄來懷柔無外八表同仁膺茲嘉會以心感
人人心自歸其來無喜矧往或追陋彼漢唐好大喜功

本之不競而末是從苟得其人不為富強苟得其地不足廣疆耳目細玩惟彼所產耽玩惑心悔之已晚皇帝明德謹之於細慎始惟終圖難於易照乘之珠衆庶所嘉詎若得賢照千萬里四夷畢來衆庶榮之曷若中夏一民無饑明良責難安不忘危小臣作戒賢聖是師

御書嘉禾詩頌

有序

洪武二十有八年秋九月壬辰朔庚戌北平永清衛之龍門禾有異莖同穗之祥其三榦合為一仍三穗

者二二榦合為一仍二穗者六是歲大熟今上皇帝
遣使來進羣臣上表賀太祖聖神文武欽明啟運俊
德成功統天大孝高皇帝親御翰墨為詩一章以賜
今上皇帝其詩首言創業之艱天命之不易除暴禁
亂之師撫民致治之畧中言天錫豐登之屢史書垂
示之嚴明堂裡薦之重末示謙沖戒謹之意為善不
足之誠大矜下民之惠與民同樂之盛心溢於言表
盖不以嘉禾之祥為可矜而以為可懼而思以自勉

聖不自聖兢兢業業足以垂訓於千萬年今上皇帝
服膺聖訓念手澤之存諷誦追惟不能自己乃永樂
三年九月朔旦用摹勒于石拓本裝治成軸分賜諸
王及近臣於是臣縉亦得與賜焉又適有嘉禾之瑞
臣縉仰惟日月之光華昭著于天地其溢而上者為
慶雲為景星為霞五色其下者為璿珠為美玉為丹
沙使人歆慕而寶愛者皆日月之餘光也古先聖帝
明王有日月光華之德其禮樂文章流風遺韻之傳

若詩書所刻百世之下光景常新猶足以使人歆慕
與景星慶雲諸福之物同一快覩而况身被其澤目
覩其盛鼓舞涵濡其有不發而為華封之祝康衢之
謠以自鳴其慶幸之萬一乎實人情之所不能自己
也拜手稽首而獻頌曰

洪武乙亥秋穀登朔方龍門嘉禾生三穗二穗交兩騰
異本同類同敷榮藍珠金粟隔露凝親藩錫貢來神京玉
匣上有黃雲蒸袞衣當日御彤廷百辟忻嘉陳休徵四

野懽呼傳頌聲帝曰俞哉稽之經旅命歸禾凜不矜作
詩致戒尤丁寧昌言受命畏天明降福穰穰恐弗勝庸
錫親藩鍾聖情亦知玄德由茲弘十年事驗天威靈聖
孝通天推至誠永樂重華信有禎賜詩日開心屏營手
澤猶存訓服膺每御翰墨懷牆羹想當睿思玉几憑智
周人極通杳冥重念稼穡憂農耕暑寒怨咨憐獨糝祗
願年登百穀成羣臣環列忭且驚百神降監來軒楹雲
霞的皪飛陶泓鴻章聖藻驅風霆造化萬彙皆流形工

巧人為何足稱奎章爛爛不可名但見東壁餘光精刻
以端溪紫玉英摹本裝以龍鸞紋頒錫羣臣荷寵榮天
球大訓河圖并人文至寶奠八紘夜夜虹光燭太清聖
子神孫萬億齡萬世黎民歌太平

視學詩

有序

胡廣

皇帝即位之初載夙夜延訪羣臣博詢治道從容燕
暇召二三儒臣于前而諭之曰使天下人人崇尚儒
術其道何由成頓首惶懼不敢言明日又問訖無敢

以對上曰必使天下人人崇尚儒術其機在上於是
咸稽首曰誠如陛下所言至是求賢之詔屢下凡巖
穴幽潛之士占一技能者即禮聘之闕下親承顧問
命之以職而優待之故四海之內罔有遺才焉明年
策多士于廷簡其尤者二十八人俾究極羣書期其
至于古人一切政事不以干之恒祿之外復有他賜
鼓舞作興之道至矣天下之士聞風而歆慕者皆奮
躍於下有菁莪棫樸之盛乃永樂四年二月朔勅羣

臣曰孔子萬世帝王之師其道在天下載於六經天下不可一日無生民生民不可一日無孔子之道朕將臨國學躬禮孔子以稱尊崇之典所司其差吉日行之於是有司差以三月朔日辛卯是日昧爽上備法駕謁廟行舍菜禮先是命禮官考謁廟儀禮官奏宋服靴袍行再拜上曰見先師禮寧過厚至是上服皮弁行四拜禮禮畢駕幸太學授經祭酒臣儼司業臣智賜之坐講文武三品以上及翰林儒臣皆賜坐

聽講講畢賜茗飲降玉音難問勉飭衣冠之士及四方之人園太學而觀者以億萬計視東京永平無足言矣明日臣儼臣智率六堂儒生上表謝錫賚有差大宴羣臣于奉天門莫不懽忻踴躍以為自古帝王崇尚儒術未有若此之盛臣仰見太祖高皇帝告成武功大興文教臨幸太學親講經書與諸儒難疑答問終日弗倦今伏遇皇上尊信儒術躬率舊典有光前烈揆諸古昔誠無與比故盛治之風薄極海宇凡

四方僻遠非一譯所能通者遣一介之士持咫尺之書以諭之莫不奔走順服頓顙闕庭夫豈威力所能強是皆文教躬行之効也臣維孔子之道與天地相為終始其在於人心者昭晰不泯當聖人在上天下大明則其道大行皇上全聖智之德居至尊之位恢弘治教表章孔子之道如日麗天中四海之民皆仰見之俾知所趨向皇上作興人心推明世教誠有以度越千古非近代帝王所能及也臣廣猥以菲才幸

依日月之光獲覩文明之盛職在紀載不敢以默謹
述為古詩一章以獻以播盛美於無窮焉詩曰

維古聖神繼天立極爰修教化以彰明德曰堯舜禹所
傳一心無間顯微爰有古今學校之政教化先務三綱
以正九疇攸叙周網解紐正路日堙不有至聖孰宣人
文大哉孔子道高德厚出類拔萃生民未有祖述憲章
乃欲無言賢於堯舜事功則然教化無窮如天垂象六
經昭晰萬世尊仰至治之要一本於茲生民永賴帝王

實師於皇太祖受天明命道侔天地卓冠前聖武功爰
定文教首崇表彰絕學大闡休風載新庠序甄陶士類
親臨璧雍以嚴視事躬御講筵觀者如雲衣冠萬國集
于橋門猗歟盛哉亘古莫比為憲萬世式承無已皇帝
續承舊章是遵緝熙聖學弗懈益勤季春初吉躬視廟
學舍奠先師秉虔有恪袞服大圭星弁煌煌穆穆清廟
濟濟裸將載臨講席列侍羣儒紬繹問難六經羣書聖
道顯明皇心以喜章甫逢掖蹕舞士子圜瞻萬億華夏

蠻貊鑿齒雕題亦皆夷懌治有先後教有本源仁義之
訓彌久彌敦於昭聖皇邁駿有赫洪化維神無思不服

平安南詩

楊士奇

臣聞天以風雨霜露育成萬物聖人以禮樂征伐綏
輯天下一出於至仁周之文武皆一怒以安其民故
雖聖人不志用兵亦不去兵以為治洪惟我國家肇
興太祖聖神文武欽明啓運俊德成功統天大孝高
皇帝深仁大義順天應人平靖四方以教以育罔有

孽害時謂泰和至于皇上益廣仁義禮樂之化海內
奠安四方嚮慕大小遐邇熙然同春惟是安南其王
孱微其賊臣黎季犛暨其子蒼沿襲悖凶屢弑國主
淫刑暴斂毒虐下民滋久滋甚皇上閔焉弗寧發詔
使諭使遷悔賊罔忌畏數侵掠厥鄰占城又寇我思
明祿州寧遠之地在廷之臣咸請發兵討罪上曰彼
匪人乎斯不可終化發詔使申諭焉賊聞其主有遺
嗣子奔來京師即上表謝過請還之上曰彼其庶幾

有悔乎遣使者衛送出境賊伏衆邀過使者執殺其
主遺嗣子事聞皇上震怒召文武羣臣諭曰予承天
命保康兆億民一民弗獲惟予弗恭人有弗迪而遽
誅斯過抑厥自新乃有弗迪至于再三而釋弗誅惟
予弗君今盜滋弗迪予必不釋將往大正匪予志用
武惟盜滋稔惡羣臣合辭力贊必決乃告祀天地宗
廟及天下山川命征南將軍左右副將軍左右參將
登神機橫海驃騎游擊鷹揚五將軍率師討賊師發

金川門上臨江送之諭之曰汝其代予往行天討惟盜暨厥子必誅弗釋暨同惡必誅弗釋凡厥脅從咸釋弗誅惟茲安南咸朕所統厥民滋困于盜罔攸訴告汝其代予往毋有侵害或有侵害即既殄戮盜猶底汝罰既殄戮盜其咨求其王遺嗣子俾統治厥民往哉惟懋師入安南黎賊脅驅其民號為百萬拒于境上民間王師來為已除害皆倒戈逆降師渡富良江入其東都城入其西都城如蹈無人之地賊

窮迫盡棄其衆獨與其孥數人並海遁去王師追之
悉生繫之不遺一人乃縱所脅從咨民所苦罷其苛
禁敷求安南王遺嗣民既罔有侵害又蒙哀矜弔恤
悉解去所苦咸竊喜曰我幸復見今日幸聖天子不
遐棄我萬里外而復生我欣然如脫虎口歸慈父母
相率謁軍門言曰惟故安南王遺嗣悉殲于寇暴無
遺惟茲土故隸中國誠願復列中國氓密比聖化俾
我暨我子我孫咸免於荒逖軍中獻所獲俘且具言

民所欲皇上重違民意下詔郡縣其地選置守吏復
置交趾布政司總之在廷文武羣臣上表稱賀臣惟
安南本漢南越地武帝置交趾郡暨五季丁氏竊據
之始僭稱王宋弗能制因授之率循為常更歷數姓
蟠結深固屢叛弗服宋元數舉兵誅訖無成功皇明
奄有四海率先歛服曾不踰世終梗寇盜天地之德
務隆包荒累誨弗悛肆急援溺仁義之旅弔伐並行
恩威所臨有迎無拒累月之頃肅清凶慙大拯塗炭

弘復疆土功德俊茂振古無倫焉惟古帝王施德建
功皆有頌歌傳播後世臣忝列從臣後輒擬古作者
之意譔平安南詩一首以示後來謹拜手稽首上進
詩曰

維天生民咸俾遂適有攸弗及肆命有德惟德格天為
君為師以教以治俾適咸宜天啓皇明悉畀所覆明明
太祖生育教誘衣之食之邇安遠歸禮昭義布長幼尊
卑皇帝繼統四方萬國益富而教和豫安適蕞爾蠻交

醜孽其間為狼為豺小大畢殘皇曰彼醜匪異人類庶
或改率予其化誨誨言諄諄弗遷益驕戕暴厥鄰盜我
邊郊百辟文武頻伏陛言弗時翦屠將俾蔓延皇曰申
誨猶或改率弗改弗率跳梁狂獮偽恭顙命賊我使人
暨彼遺孽磔身百分皇曰彼醜獸心靡易螟螣弗除遏
遺嘉稷惟皇上帝付予八埏有溺弗援予滋違天誕命
將臣暨旅師徒往勵汝勇往宣汝謨咸弔困窮殲惟醜
虜職敷予仁匪曰究武六師遄邁辭直氣厲涉危蹈深

若履平地嘽嘽烈烈赫赫業業如飄剗剗如霆截截蠢
彼醜虜脅驅為拒仁威天降孰有強禦雞翎夜闢富良
為帶投兵委戈奔降迓拜乃入交城乃走兇渠繫之海
隅如探取雛乃咨脅從悉解而縱乃視交人予其疾痛
交人恹恹爰始色溫舒其競競爰始笑言交人有言我困
荼毒天子生我旋瀘為福交人有言我初匪夷逖遠淪
汙陷茲塗泥天子聖仁曷返我初內我庇我永康不虞
俘獻于廷天子受之民有願欲天子予之四方有聞懼

喜告語天子聖仁我有父母救民之疾不以遐僻有梗
弗率必誅不釋天子聖仁孔武且神孰其為梗鑒彼交
人芒芒四裔威服德拊巍巍中夏尊安鞏固海航陸車
來享來庭千萬億年拱我皇明

騶虞詩

有序

梁潛

臣聞自古聖帝明王至治之極必有禎祥若麒麟
鳳凰醴泉甘露應時而產皆所以符聖徵彰
至德者也乃永樂二年秋八月皇帝冢弟周王

畋于釣州厥有異獸白質黑章猊首虎軀其狀
孔威不可迫視王俾部曲俟之其性孔仁遂擾
致之以詢之故老蓋古所謂騶虞者此其是已
夫惟仁君有至信之德則見於是九月丁未王
率厥屬表獻闕下皇帝服皮弁服御奉天殿以
觀不震不動柔伏自然皇帝若曰厥為嘉瑞予
罔敢知維致自昆弟之邦予其嘉焉於是太子
太師淇國公臣丘福謹率百官上千萬歲壽既

而京師人士忻喜聚觀咸以為聞自古昔見始
今茲臣潛伏覩盛典不敢自默退而考之騶虞
詠於詩記於禮列於傳記或以為義獸或曰仁
獸或曰聖獸至以為嘉祥者則其言皆同也傳曰
國家將興必有禎祥洪惟皇上紹登大寶率由
舊章親親而仁民恩沛而義洽萬方咸和以及
乎庶類泰同穎於郊蠶成繭於野文犀白象諸
福之物抑之而愈臻却之而復至何其盛也豈

非上天以是昭至德哉臣潛忝職記注苟不形
之歌詠以垂示無窮輒為不職謹百拜稽首而
獻詩曰

於穆聖王綏德兆民端本自家篤於周親恩沛義
洽如煦春陽至和沖融發為禎祥禎祥伊何厥惟
騶虞產于王國惟皇德符王馴致之獻于帝庭素
質玄章雲舒霧凝帝乃觀焉載戢其爪爰言究之
踐匪生草吁嗟騶虞外何其威內何其仁匪苞而

鳳匪角而麟吁嗟騶虞曷為來哉王拜稽首皇則
召之皇之仁民淪膚洽肌弘暢旁達物以不疵皇
之孝友本乎至性萬邦咸懷物以類應皇帝曰俞
惟王信恭王乃麟趾矣必騶虞皇帝曰吁凡百在
位惟德召和匪物其瑞庶臣拜手皇帝萬壽慶祥
畢臻德音是懋

瑞應甘露詩

王直

臣聞聖人之德配天地則天地之心欣合無間

故必凝英萃和以昭其盛若黃帝之甘露虞舜
之卿雲是也恭惟皇帝陛下以至誠之德統承
太祖高皇帝基緒繼述之孝不忘乎公遵用舊
章未嘗改作德化所及罔不受戴故自天地之
所覆載日月之所照臨無有遠邇熙然泰和動
植之物亦各生遂而太祖高皇帝之盛德大業
愈益光明是以天發其祥地闡其珍景星慶雲
醴泉甘露嘉禾瑞麥麒麟騶虞諸福之物駢臻

皆至此臣等之所親見天下之所共知也而聖
心惓惓益勤不懈乃永樂十七年十一月某日
甘露復降于孝陵凡四日松柏之上凝為玉脂
融為瓊液絜若垂珠聯若編貝臣民聚觀鼓舞
懼忭咸以為甘露之降不于其他而于孝陵者
蓋聖孝所致也於是皇太子命採取馳獻于北
京皇上祇薦宗廟傾賜百官芳香之氣旁達左
右甘美之味莫可擬倫誠天地之精英聖明之

上瑞所以彰皇上之大德為天地之所悅鑒景
命之隆長太平之悠久歷千萬世而益盛也昔
虞舜有卿雲之祥百工相和而歌之萬世之下
因是想見帝舜之德使人起敬起慕今聖德之
大實同天地甘露之瑞不減慶雲是宜有紀也
臣愚不自揆輒形之聲詩以繼虞廷之歌垂之
萬世使知聖德格天之盛巍然煥然如此臣等
誠懼誠忤稽首拜手謹言 甘露昭聖孝也

有瑞甘露其集灃灃被於長松孝陵之岡如珠之
英如瓊之漿於絜其光承彼朝陽有瑞甘露其融
湜湜亦被于柏孝陵之側如肪斯白如玉斯潔其
馨有烈敷暢旁達維彼露兮天乳之滋維此受兮
上帝之貽皇有大德神人具依集此大瑞福祿攸
宜皇德之大實配于天永言孝思太祖是憲懿彼
舊章于嗣于宣夙夜敬恭穆穆乾乾維太祖肇邦
皇以廣之維太祖受命皇以康之顯顯大猷萬邦

仰之巍巍成功無以尚之上帝太祖樂此德馨屢
開厥祥甘露斯零甘露斯零維帝命是膺維太祖
是承皇祚以攸寧乃取乃獻皇太子之恭乃賜乃
頒以洽于臣工匪飴匪醕既甘既融靈液攸降物
莫與同臣拜稽首天子萬年以臨下民以對上天
維禎維祥繼繼綿綿聖子神孫萬世之傳

芝頌

禮部尚書毘陵胡公於解署之南作小軒以為思政


之所凡公之佐天子舉禮樂以施政教則必思其宜於此而後行之天下公忠信明達君子也其精神感而和氣應之蓋有不期然而然者宣德八年九月軒之中斃斃隱起發而視之有芝生焉其色純白如玉如截肪輪囷敷暢鮮潤華好公卿大夫來觀皆以為瑞而贊詠之夫芝之瑞始於漢重於唐至宋而極盛蓋謂和氣薰蒸之所成非人力能為也然彼宮殿門廡之所產者國之瑞也生於士大夫家倚廬齋閣之

中者家之瑞也今皆不然惟於公思政之所見之蓋
公盡心於其職故天以是彰厥美則茲瑞為公精誠
之應無疑也然竊思之公之所任大矣其應亦有大
者焉此特其兆也禮曰樂者天地之和禮者天地之
序又曰禮樂極乎天蟠乎地行乎陰陽通乎鬼神此
豈細務哉今上有聖明之君而下得公之賢以為臣
厚禮樂之本達禮樂之用極其至也天地安其位日
月著其明四時寒暑順其序明而為人幽而為鬼神

流而為川峙而為山精而為百穀粗而為草木鳥獸
一皆遂其性無毫髮爽焉至和之氣充周于六合之
間則甘露醴泉器車馬圖龜龍麟鳳諸福之物靡不
畢至而國之大瑞備矣故曰此特其兆也有其兆而
贊詠之思迓續其大者云爾烝民之詩尹吉甫送仲
山甫也而序者以為美宣王蓋能任賢使修其職宣
王之美見矣今公之有此皆上委任之所致則諸公
之贊詠雖以美公而亦以美朝廷也作芝頌

春官名卿禮樂宗茲誰任者毘陵公美哉新署鬱穹崇
華軒結構居南東聖明在上眷遇隆懷清履直持敬恭
孜孜夙夜亮天工施諸政教審厥衷精誠孚暢靡不通
靈芝煌煌產其中至和綢繆之所鍾殊姿密理鮮且重
刻脂鏤玉紛璵璠參成樊桃差可從瑤英紫脫徒芴芴
嘉生本自造化功滋殖豈與凡卉同知公秉德久愈充
輔翼帝道宣皇風上追夔夷躡高蹤體信達順更豐融
四靈畢至百福隆君明臣良格昊穹頌歌繼作聲淪淪

鴻名赫奕垂無窮



明文衡卷二十

欽定四庫全書

集部

明文衡卷二十四

詳校官庶吉士

臣

翁樹培

助教

臣

常循覆勘

總校官降調編修

臣

倉聖脉

校對官編修

臣

勵守謙

謄錄監生

臣

薛夢陽

欽定四庫全書

明文衡卷二十一

明 程敏政 編

贊

龍馬贊

宋 濂

西南夷自昔出良馬而產於羅鬼國者尤良或云羅
鬼疑即古之鬼方其地有養龍院在兩山之中泓渟
齋深開闔靈氣而蛟龍實藏其下當春日始和物情

酣鬯夷人立柳阮畔擇牝馬之貞者繫之已而雲霧
晦冥咫尺不能辨色類有物蜿蜒上與馬接蓋龍云
逮天色開霽視馬傍之沙上有龍跡者則與龍遇謹
其芻藳而節宣之暨產必獲龍駒馬粵若洪武四年
六月壬寅夏國主明昇以全蜀降獻良馬凡十而其
一色正白乃得之於阮者身長十有一尺首高九尺
足之高比首而殺其二尺有肉隱起項下約厚五分
廣三寸餘貫膺絡腹至尾間而止精彩明晃振鬣一

鳴萬馬為之辟易羈勒不可近近輒作人立而吼上
謂天既生此英物必有神以司之親撰祝策詔有司
以牲牢祀于馬祖然後勅典牧副使臣高敬囊沙四
百觔壓之人跨囊上使其游行苑中久之性漸柔馴
適八月癸巳上將行夕月之禮於清涼山壇上於是
乘之而出如躡雲而馳一塵弗驚皇情悅豫賜其名
為飛越峯復命御用監直長臣馬晉臣繪其真形藏
馬臣濂稽諸載藉漢之元鼎中有神馬出渥洼水中

馬之生於水者尚矣養龍之說雖相傳於夷人要當可徵不誣也肆惟皇上以大德而位大寶日之所出日之所沒無不梯山航海獻贄奉琛邇者獨角之犀來自九真食火之鷄貢于三佛齊之境其他侂形僞狀藉藉紛紛且不一而足而況此水產之龍馬乎周書有云不寶遠物則遠人格所寶惟賢則邇人安皇上宵衣旰食日懷保於小民巖穴之士蒐羅殆盡將圖治安如黃虞時其遐荒殊裔珍毓奇產未嘗有心求之

所以榮光休氣洋溢中國仁聲義聞充洽八表而龍
媒之異自致於天閑十二之中揆之於書前聖後聖
蓋同一軌轍也其視貳師之遣黠武窮兵以索諸大
宛者果為何如哉臣濂以文字為職業際茲盛美不
敢默而無言謹述贊辭一首以貽諸後世贊曰

天駟熒蛟龍升靈泓澄神馬生祥飈瑞靄晝杳冥天一

翕聚通精靈龍胡

漢郊祀志龍垂胡鬣胡乃頸下垂肉

盈鳧臆輕竹披耳

鏡懸睛花雪捲毛光照夜汗溝有血霞流頰振鬣鳴萬

欽定四庫全書

明文衡
卷二十一

三

馬驚閃流電逐飛星九霄彷彿從龍行但聞瀟瀟風雨
聲三川平八極寧真龍媒獻龍廷出入天門駕龍輶太霞
五彩滿瑤京皇風清皇道貞皇威明茫茫堪輿內孰敢
不來庭陋彼漢將軍空圍貳師城乃知天子在樹德不
必連年徒用兵

滕奉使贊

齊人王蠋有言曰忠臣不事二君烈女不更二夫女
之從人一與之醮當終身不改譬之白璧小有玷辱

人將斥去而不之顧臣之事君也其理亦同故蠲特

竝言之事兩夫者雖辨如虞姬智如鄧曼吾知其決

非良婦事二君者雖功如汾陽

唐郭子儀封汾陽王

才如西平

唐李晟封西平王

吾知其決非良臣嗚呼使此義昭如白日

人臣安肯懷二心而國安有喪亡之禍哉東陽滕茂

實當宋靖康初以太學正與僉書路允迪奉使於金

議割三鎮太原尋奉密詔據城不下金人怒囚之雲

中欽宗北遷茂實謁見涕泣請從行者不之許其

後允迪南歸茂實獨留鴈門終身不再仕臨沒令以黃幡裹屍而葬仍刻石識云宋使者東陽滕茂實墓此殆不事二君者與當是時有宇文虛中者亦以黃門侍郎使金見留遂改節易行反面事讎其後雖欲奪兵仗南奔而自贖卒亦不逃君子之譏其視吾茂實果何如也茂實已矣人至今想其遺節如神龍不可得見至視虛中輩不啻若鬼蜮犬豕有識妄婦亦羞聞之此無他人心天理終不可誣也乃作滕奉使

贊用規事君而有二心者贊曰

漢有蘇武奉使不屈滕公配之有聲烈烈黃幡裹屍以
全臣節如璧之白弗緇弗缺其人雖亡而神不滅上游
帝所凌厲日月降臣見之肝碎膽裂敢述贊辭勒在貞
碣

溟滓生贊

溟滓生者盱江廖應淮海學也抱負奇氣好研摩運
世推移及方技諸家學年三十游杭上疏言丁大全

誤國狀大全怒中以法配漢陽軍生荷校行歌出都
門道傍觀者嘖嘖壯之抵漢江濱遇蜀道士杜可大
揖曰子非廖應淮耶生愕然曰道士何自知之可大
曰宇宙大虛一塵爾人生其間為塵幾何是茫茫者
尚了然心目間矧吾子耶然自邵堯夫以先天學授
王豫天悅天悅死無所授同葬王枕中未百年而吳
曦叛盜發其冢得皇極經世體要一篇内外觀象數
十篇余賄盜得之今餘五十年數當授子吾俟子亦

久矣乃言于上官脫其籍盡教以冢中書其算繇聲
音起生神鑒穎利可大指畫未到者生已先意逆悟可
大自以為不及學既成去隱宣歙間遇余安裕弋
陽將教之安裕勸生業中庸生瞠目厲聲曰俗儒幾
辱吾康節於地下矣復去之杭客賀外史家畫市大
衍數夜沽酒痛飲即吐吐即飲不醉如泥弗休醉
中嘗大叫曰天非宋天地非宋地奈何奈何語聞賈
似道遣客叩之生曰毋多言浙水西地髮白時是其

祥也似道未解復召至屏人與語生曰明公宜自愛
不以宋鼎移矣似道惡其言掩耳走生亦徑出過曾
淵子家索酒轟飲酒酣作嬰兒啼曰大厦將焚燕猶
呢喃未已耶復賦歌以見意都人士聞之競指以為
怪民不與接獨太學生熊晞聖猶時造其廬生私執
熊手謂曰吾端居層樓聞空中戎馬百萬來人鬼作
哭泣聲壬申襄樊陷甲戌宮車晏駕乙亥長江飛渡
似道亦殛死臨漳丙子三宮播遷諸王大臣皆南北

亂走噓吸事耳子不去欲何為居亡何宋事日非沿
江州郡望風奔潰生大慟曰殺氣入八閩廣中吾不
知死所矣遂遁去其言無一不驗後四年病死處州
學中年五十二無子唯一義女從之生宗堯夫先天
之學頗自謂知易每見諸易師傳䟽不問淺深輒訕
駁以為樂及論後天則尊羲畫為經彖爻繫辭為傳
黜文言彖象二傳為九師之言且謂說卦非聖筆不
能作上下繫乃門人所述序卦直漢儒記爾蓋生聰

明絕人未聞道而驟語數故其論經多失中然性使
酒難近又好訐人陰私人面頸發赤不顧罕有從其
學者唯國子簿吳浚進士彭復樂師之浚不卒業復
屢受唾斥不怨生將遁時召復至口發例手布籌雖
平昔所靳若終身不示人者一舉授復復後又授鄱
陽傅立云或曰生瀕死語女曰吾死後一月中朝命
山姓烏名使者來徵吾及傅立立當過予門汝可出
藏書示之立當以此致大官後皆如其言所謂山姓

鳥名崔鵬飛也生所著書有玄玄集厯髓星野指南
象喻統會聲譜畫前妙用數十萬言今猶間傳於世

贊曰

龍圖成章有文從衡以濬以明以洩其藏以奠予玄黃
昔我素王韋編三絕墜緒微茫誰其我綴我參我腴九
師襄之我苞我晶百氏攘之如河之渾如瞠而昏如治
絲以琴天未降割一髮攸存維洛有士居于百原超神
冲漠凝於畫先數往知來小大斯甄莫峻匪厓我陟其

顛莫深匪淵我淪其泉簡材以畀非隱弗傳有冥者冢
卒詔以宣或得其牘載神子言炎炎宋錄維其訖矣長
星蝕柳色之赤矣青祥見徵士髮白矣朋昏以世莫之
戚矣魚在在鰲尚其息矣維生之知中如沸羹彼昏弗
知覆謂我狂我狂如何我憂孔多我山我河我用弗磨
俾淪胥以訛我酒既嘉我瑟又醵我寧不嘯歌北風其
涼旗旐央央戎車龐龐蕩蕩江流杭之如陸有腥其穢
流血沃沃海氛方殷其何能目人有恒言風雨漂搖夏

宇障之涉于大川烝徒楫之楫副宇橈子子焉依國武
斯隊不知攸戒日隕弗升雖畫作夜鴉舞於林鬼瞰于
舍孰投是艱曾莫之艾乃怒乃驚乃瞻乃行乃遯死于
冥睠生之為胡乃神以著徵之古聖匪程伊度何以言
之卒淪于數一曲之淹不通其故易道既泯數亦不類
激贊於生發我長喟月出皎兮在天之心在天之心何
古何今

陸秀夫像贊

身抱龍髯兮眼不見水鳳闕雖遐兮龍堂則邇玉雪皦
如今肯汙泥滓赤日出海兮爾心不死

文官花贊

胡翰

覃木之植鍾美於天地著見於古今者其品多矣大
率以不恒有為瑞以不多得為貴華平實連紫脫閤
閱國家之瑞也曠代始有之揚之瓊花潤之玉蕊天
下之美也豈世所多得哉物皆然今鎮江其地即潤
也范氏世居之為望族有花曰文官先世所植也自

吳中富人及京洛公卿之家斥苑囿飾亭館競一花一草之奇以夸示世俗極游觀之娛者往往求若是花蔑乎未有聞也當唐之世唯學士院有之其曰文官意亦以是邪范氏世業儒以詩書起家為令宰任司臬者衣冠相望於宋元二百年之間其於是花亦有不期而符者邪天地生物自形而色白者不能以為緋碧者不能以為紫今以一植而具有其美一日而遽為之變其得於造化之妙非人力能致之唐人

以戎王子為異花若文官乃異花也夫以造化所鍾之異天下不多得之物而又植於衣冠之族入有名公卿如辛幼安者本其所自而書之製為樂府以歌之雖謂之美瑞可也而顧不廁於瓊花玉蕊之列者蓋范氏故閭閻也其花先世所植手澤也非若蕃釐招隱老佛之宮瓊花玉蕊人得趨而見之使人得而見之有力者將取而去之矣則范氏珍之宜至而傳之不廣也天下之物負其所有不自見於世者皆是

類也余老矣於世無所好願以平生不知有此花一
旦聞之可為寡陋之歎不能無幼安豪發之情焉乃
述其事以貽其後人從而為之贊曰

泰園委和嘉植挺生抱素含貞揚采代榮如彼命服品
秩有章下民所望君子之光我徵前聞厥類匪一瑞木
四照神芝五色不貴異物邁種厥德于古有訓君子是
式

靈峯寺植木贊

劉基

靈峯寺有松杏與樸竝植焉劉子見而感之為作贊

曰

杏葉蔥芊有子可以實籩松枝扶疎有苓可以引年樸
狀如檮衆蠹所穿擁腫液瞞不可以鑄胡並植于庭溷
厥醜妍明堂求材殷趨爾先松戕杏割樸獨宛然嗚呼
樸乎孰女之憐維女之全抑棄於人乃獲乎天耶

宋景濂像贊

王 禕

外和而神融內充而面晬衣冠雖晉人之風氣象實宋

儒之懿夫其知言以窮天下之理養氣以任天下之事
隱則如虎豹之在山出則類鳳麟之瑞世後乎千載而
有存中乎兩間而無媿此盖古君子之所難然吾謂斯
人之必至

筮作贊

有序

唐肅

予子之濳欲筮而無著請以竹代之予曰易謂聖人
之德幽贊神明而生著則著固靈矣然地無著可廢
筮乎屈原離騷云索藁茅以筮篲漢方技傳亦有筮

筭須臾孤虛之術說者曰筭竹筭也楚人以結草折竹卜為筭然則楚人之筭筭以無著歟夫著蔡產也大龜可卜者出於蔡上有著百莖下必有靈龜守之蔡非楚地故以筭代著而卜焉今越去蔡尤遠著或不能致則倣筭筭之法無害況吾所以質諸神者在誠不在物之漳既作之因為贊俾刻其櫝云辭曰祝蜥蜴以祈雨龍之同類也禁原蠶以助牧馬之同氣也繫竹之視著均草彙也虛中弗窒又圓其外也虛則

有靈具乎智也著百莖而同本合萬殊為一致也以有
代無理或弗悖也爰韜爰櫝受命則出也載營載畫吉
凶以示也於戲泰筮神明之攸寄也曷竹曷著惟秉誠
之無貳也

太師韓國公畫像贊

蘇伯衡

堂堂韓國秉國之成鴻業以定經費以盈羣賢以進百
度以貞四裔以服品物以亨公初無作孰得而名天實
生之光輔大明天下之士睹其儀刑想其風采不謀同

聲曰漢蕭何唐之玄齡功成而退不伐不矜衣朱鳥
安享尊榮蒼顏白髮時遊大廷其德日新其福日增天
子萬壽共享太平

宗忠簡公畫像贊

公之力足以旋乾而轉坤公之功足以却敵而安夏始
以一言能返北旆而南還後以二十四疏不能回南轅
而北駕且留鑰之任方切而巧言遽入於帝聰度河之
志未酬而大星已殞於中夜何人之於公則知媚嫉而

天之於公則不知假借此有志之士百世之下所以想英風而激昂拜遺像而悲吒也

象山陸先生贊

趙東山

儒者曰其學似禪佛者曰我法無是超然獨契本心以俟聖人百世

敬贊先正誠意伯畫像

劉仲璟

虬髯電目探天根兮幹地軸扶龍興雲四方以肅以生民休戚為憂喜以大道晦明為榮辱武功既成而文治

未盡其用者蓋天也耶抑人也耶

田疇贊

有序

方希古

智勇人之所有也善用之為難忠義人之所慕也審處之為難天下非無豪傑之士而功不見著於世何耶豈其智勇之不及忠義之沮喪歟用之失其時處之違其機者衆也苟或不用於曹操則可以比子房董卓呂布不為逆亂則可追韓彭廉丹王尋為漢而死則有以與周苛等而皆不免於君子之誅其迹同

而其所為異也漢末之亂酷矣余求奇士於其時得
一人焉曰田疇忠不避難勇不畏死奮然感劉虞之
遇而思為之報讎公孫瓚既亡謂可以盡力者漢室
而已故應曹操之辟既而知操非忠漢者也故辭封
侯之爵介不同俗清不悖倫忠在樹功義不苟合其
才良其行果蓋豪傑之士非當時姦雄所及也論者
眩於成敗使操以有功見取而疇之志義不大章明
於後世豈不謬哉孟子曰人有不為也而後可以有

為若疇者庸非其人耶其不成功者命也豪傑之士
制於命而不獲施者衆矣善觀人者觀其志不觀其
事觀其器不觀其位由是而言士之不幸者獨疇乎
哉吾是以悲而贊之其詞曰

古之觀人不於用舍考其所存以第高下譬諸龍駒垂
首糞車豈以其賤斥之為駕齊侯千駟如南面王仲尼
之嘆夷齊有光漢季分爭得國者操吾獨何為田疇是
悼操雖據國犬鼠之雄殺后無君天下不容奚若君疇

忠義蓋世委質劉虞身世靡二使受之命為漢大臣殺
操復漢必不顧身嗚呼鄙夫惟利是就誰能為儔我與
為友

翰林待制華川王先生畫像序贊

傳曰國之將興必有禎祥其得人之謂乎故善觀國
者不觀其甲兵之雄財粟之多土地之大而觀其得
人賢否誠得其人弱可強敗可成不得其人雖威力
富庶敵於海內亦不免於亡天將授人以天下亦必

授之以守天下之器賢者之所在天下之所歸也當
國朝之始興地界於羣雄之間最微矣然是時有數
君子者皆起而從之識者已知天命所屬既而或以
功業定亂或以文章贊化卒能合四海於分裂之餘
不越十年遂致平治嗚呼是豈非天哉烏傷王先生
充在數君子中博辨通達以文章名上之為吳王授
江南儒學提舉司教理陞禮部侍郎兼引進使轉起
居注出同知南康府事及上即天位召入議禮改章

州通判會詔修元史遂徵還與金華太史公俱為總裁及史成拜翰林待制未幾而出使西陲雖未獲究其設施然其有益於國者大矣世之趨近功者恒謂儒者不足為時重輕此非知本之論譬之人身彼一才一藝者猶手足耳目然而賢者則元氣也人見手足之能持行耳目之能聽視而不知皆本於元氣不足亦惑哉某幸受業太史公而以未識先生為恨先生之子紳以畫像見示乃叙而贊之曰

天眷有明勃然龍興豈惟智謀得人乃成其人伊何匪
將匪相爰有君子海內之望望既歸之孰能違哉彼王
彼侯小大畢來惟華川公蔚其文雅位雖不崇名動天
下人知其名豈知其心我懷德音山高海深

義鶴贊

并序

高啓

吳報恩寺浮屠之顛有鶴二巢焉以遊以宿出返必
俱一日其雄星脰輪索中奮翼自擲空懸弗脫雌下
首大鳴若籲于人衆憐之莫能升遂宛轉而絕雌依

其傍弗去羣鳥欲磔之輒引喙怒逐不使近逮毛骨
盡化乃已余居直寺東嘗見其彷徨飛旋形貌慘悴
風雨之夕哀唳嗷嗷若號慕然余念夫世固有伉儷
相悅者矣一旦失所天哀未改而已他適塗膏自媒
唯恐非艾晨眺夕噓曾無含忸世嘗以禽喻惡人寧
不辱是鸛哉迺贊曰

嗟爾鸛乎維鳥之特猗雄死自守禦鳥之賊猗獨棲于
標夜失其匹猗哀嘶返顧不啄而食猗厥質始化豈貞

之鬼猗匪魯黃鵠孰配爾德猗

戴院使贊

如常

神閒以清氣和以平質頎而厚貌澤而明學則究軒岐之奧書則啓金石之經昭代之老處朝廷蓋得其道醫國之手雖蠻貊亦知其名懷仁慕義秉德存誠是宜受高皇之獎譽荷今上之寵榮齒餘八袞而強健身備五福而康寧若夫託泉石之高致締松桂之幽盟彼畫史者徒知寫其歸隱之趣而莫能得其戀闕之情也耶

陶弘景讚

王達

士之善於觀人者往往不於其事之所已為而必原其心之所隱微者而觀焉惟能原夫心之隱微者而觀之則其為人者昭昭矣彼泥其迹之顯然者而觀之夫豈得容偽於其間哉吾於齊梁之際得一士焉陶公弘景公生而有異四五歲即知用荻畫灰以為書甫長讀書萬卷以一事不知為之恥齊高帝作相用為諸王侍讀彼時雖在朱門閉影息交不外物接

永明間挂冠神武門已上表辭祿矣當斯時也窺神
器者匪一人朝為君臣暮為讐敵朝為揖遜暮為篡
奪雖欲以力濟之奈天道之未定何於是自勾曲遍
歷名山尋訪仙藥每經澗谷必坐卧於其間所居皆
植松聞其聲輒欣然為之樂性好著述凡陰陽五行
風角星算山川地理方圓產物醫術本草罔不洞究
自以為神丹可成壽可致梁武資之以黃金朱砂等
物亦不靳而受之至八十五無疾而逝夫當太清之

際以梁武為故人取宰相如拾芥此衆人所不能得而公可得者可得而公恬不為之意茫然與世相忘焉公之賢為何如蠱之上九不事王侯高尚其事者不偶於時者之所為也公可謂偶於時矣而猶不出者庸詎知天下無可事之主哉故其詩曰夷甫任散誕平叔坐論空豈悟朝陽殿遂作單于宮殿後天下玄理游興武事日弛侯景篡位實在昭陽然則公固有遠慮先燭之智矣亦豈可謂公為長逝忘返而無

憂世之心者哉予故仰其高風想其遐躅原其心之
隱微者為之讚曰

蓬華既高芝蘭斯晦梟鴟成羣鸞鵠斯退君子知微默
領心會醇酒雖甘詎宜忘醉哲哉陶公靡所不通糠粃
富貴勾曲之從月高秋肅一枕松風安知其他我保其
躬彼不知者謂公少疵山中宰相夫豈介而我知公心
澹然無為不與物絕龍變是宜上陵下替世道日榛寧
於其時俯仰屈伸烟霞泉石今古乾坤高風邈哉不見

其人

自題侍教像贊

楊士奇

此老之生今七十有三年其仕凡三十有七歲歷事四
朝恒持一志顓顓乎恭慎肅肅乎嚴畏不敢內非類之
交不敢徼非義之利祿愈增而意愈澹秩愈進而心愈
惴治官務如家務視海內如室內雖不能萬一之有濟
而不敢須臾之或怠誠懼上孤明聖之恩有忝清白之
世閱春華之屢謝撫寒栢而猶翠聊自寫其素存示同

宗以祗勵

族孫挺來北京旦夕在左右里蕭生為寫侍教圖挺以求贊因謾書此然士之師古挺尚從事乎遠且大者可也

七十歲自贊

楊榮

荷蒙先世積德之厚叨承列聖眷遇之隆久侍禁近冀效愚忠當齒力之既衰尚責任之愈崇自愧乎進無所補退不我從徒存心之兢兢而懷憂之忡忡惟古人堯

舜其君民者素景仰其高風思勉焉而不懈期一致於
初終者也

故延平守胡子祺贊

鄒緝

故延平太守胡公既沒三十年緝始得其墓表而讀
之為之嘆曰嗚呼士惟患不見用耳未有用而不見
其效者况得顯行於其位其大小設施豈得不有所
見哉國家初興凡所選擢必擇其才良端直之士而
任之士既抱負其所有故見諸有為皆足以震耀於

當世而其所立類非迂儒俗士所能及若公是已公
以洪武三年應詔至京師受知太祖皇帝擢拜監察
御史即上書論遷都關中事其後出為按察僉事調
知彭州陞知延平府事以沒公在風紀不為激擾之
政而人畏其威蠻服其化獄以常空其為彭州築隄
堰修水利勸民務本力業郡中翕然稱治至為延平聲
稱尤著於今延平之人能道其行事蓋其悌弟之化
有以信於人而其才德又足以服之惜其名位止於

此不克臣於久遠也昔何武為揚州刺史凡所刺舉
未嘗敢自私而又仁厚以處下故郡國各重其守相
張詠知成都寬嚴適中威惠信於人故既薨而蜀人
為罷市蘇子瞻謂其遺愛蜀人久而尸祝之若公可
謂無愧於公者矣公之次子光大為春坊右庶子與
余為同門友既覩公之事乃追為之贊曰

昔在太祖勤思賢輔有偉哲人實承知遇布衣登朝居
法從班遷都之議動于天顏內臺外憲薦揚風紀兩紆郡符

鳴玉曳履材宏德碩無積不施惠愛所加民自懷之肅肅之儀瞻望莫及筆策之從願為公執

鏡容自贊

楊溥

資可以為學而理或未明時可以行道而力有不至緬懷古人夙夜惟厲而莫及焉嗚呼老矣

吳敏德像贊

王直

海虞吳敏德為都察院右僉都御史持敬慎之心秉廉直之節其議論舉措蓋有前賢之遺風視世之隨

俗變化方外而圖內者相去遠矣此其像也而予為之贊

允穀吳公率德自躬聖明御邦克躋顯融豸冠戕戕邦之司直必誠必恭不詭不激雍容進退端笏垂紳小人所憚君子所親維昔名臣始終一致神之相之福祿斯備風霜肅物生意寔存願弘厥施以暢皇仁

自贊小像

其才學則迂踈其志行亦狂簡幸逢時以效愚每惴惴

於自反然僚友謂之強而主上謂之板愧變通之未能
徒為達士之所莞也強者矯亢不阿之名板者愚執不
通之謂蓋氣質蔽固之已深而學問變化之未至若謬
比於儉邪則難合乎公議雖內省之無愧然豈敢忘敬
畏也哉

訥齋贊

金寔

言可訥乎心因言以宣道假言以傳言不可以訥也言
不可訥乎身由言而困事由言而僨言不可以不訥也

訥乎訥乎殆將訥其所不當言而不訥其所當言也夫
在鄉黨則恂恂在宗廟則便便是為訥之模

伏生授經圖贊

有序

周叙

伏生諱勝濟南人也案史記伏生故為秦博士孝文
時求能治尚書者天下亡有聞伏生治之欲召時年
九十餘老不能行於是詔太常使掌故晁錯往受之
先是秦焚書伏生壁藏之兵興流亡伏生求其書亡
數十篇獨得二十九篇即以教于齊魯之間學者由

是頗能言尚書諸山東大師無不涉尚書以教矣又按漢書顏師古註當錯受書時伏生老不能言言不可曉使其女傳言教錯齊人語多與潁川異錯所不知者凡十二三畧以其意屬讀而已是圖蓋當時授經之象中坐者伏生旁侍者其女前跪而坐者錯也圖用縑素僅二尺而蒼山古栢靈芝石床書几之狀莫不曲盡巧妙畫者之意亦工矣哉於戲聖人之道寓於六經而書者二帝三王治天下之大經大法所由

載有天下者不可不以之取則也使非漢文求之伏
生傳之天下後世將貿貿焉莫知聖帝明王精神心
術之所寓而道晦矣愚故謂尚書一經不幸焚滅於
秦幸而表章於漢尤幸而傳授於伏生也且是時伏
生年已九十餘使漢文求之不早不幾於泯焉矣乎
然則是書之傳豈非天耶而其所以繼往聖開來學
之功又豈居漢之諸儒後哉戶部員外郎高君信以
是經登進士歷官朝著有聲家藏斯圖命工裝潢

成軸以余家傳是經也求識之久之未敢執筆而高君之請益堅敬用書其故而為之贊曰

大哉聖道寓諸六經煌煌尚書實統厥成秦亡漢興斯道幾晦展也伏生爰際其會心惟口誦以教以傳晁錯之受漢文之賢斯文千載既晦而顯展也伏生其功不淺咨爾後學是仰是宗拜瞻圖像邈焉高風

文昌帝君像贊

劉定之

有以孝陵御容傳寫為文昌帝君像者臣定之稽首

贊曰

日行于天光寓萬形全得為月分得為星雲得為霞雨
得為虹影得水底火得鏡中圓明晶彩晶彩日同於皇
開天自天陟降其寓于茲文昌帝像主世之文緯地經
天有赫厥用無私其權沖天烏紗朶雲龍袍就之日近
望之天高臣拜稽古古亦有是宋仁宗像即真武帝

明文衡卷二十一

欽定四庫全書

明文衡卷二十二

明 程敏政 編

七

志釋寄胡徵君仲申

宋 濂

華容孝廉與廣平文學遇于神明之臺孝廉問曰予締子
交已越二紀其貌固狎其志則未之聞也子能為我揚擢古
今而釋之乎文學曰走也不敏長自巖穴鶴毳編襦土芝溫

食動趾踉蹌發辭讓吃忽挾細縹去歷都邑見者大噱指為
木刻錯愕周章無地寄迹獨孝廉煖我以溫顏前我以重席迪
我以三古之芳猷期我以九能之至域拜孝廉之貺厚矣孝廉有問
敢對以臆寓形霄壤不翅蟣蠓時幻歲遷電滅鳥空唯極所
適其樂則鴻出游大澤才騫氣雄鼻尖出火耳後生風金張
前驅許史後從牽黃臂蒼龍矢韞弓仰落雙鵬俯搯長
熊毛血旁灑塵全四封入據邃館廷實惟供壘尊旁午
豆俎衡從肉腴含春耐暈移童器周八音律合六同部分

立坐筵布西東綠華白台南威紫衝靨輔奇牙瓌質姣
容歌喉撼塵舞袖翮龍其有事固日新而弗足也竊有
志焉孝廉能許之乎孝廉曰欲敗度縱敗禮古人所戒
子豈宜蹈之願聞其他文學曰班生投毫令名煌煌終童
請纓其齒甚少不有焰焰孰潛其燭非勒銘於燕然必
建標於粵徼軒冕以之蟬聯紳笏以之嫖嫖衛霍擁軫
樊陳執纛公子掃門王孫媚竈霜露係乎吹噓予奪視
其愠笑其銳也若孟勞之出魯禔其重也如天球之鎮

周廟天下學士揮汗為雨聯袂成帷莫不仰遺光而企
未照其視處環堵厄藜藿擊壺而越吟倚柱而吳嘯卑
卑南陽之畊落落滋泉之釣口心共語影形相弔不亦
大有徑庭乎孝廉曰功高者身危位隆者名喪此衆人
之所嗜而君子之所慎也文學曰神封靈壤作鎮下方
會稽衡華沂岱嶽常霍及醫閭分布九疆總三條於中
區限兩戒於外邦他若滄漲蕩浮青翰迷茫包天裹地
循環相通湯叶其間怪偉靡可數詳天孫嶽長水伯瀆宗

莊叶昂宿寶符之貴玄龜青鯉之章金篋玉策之探日月
珪璧之藏或隱而晦或露而彰走將簡徒御戒樓航濯
足於咸池晞髮於扶桑豁氛埃於人瑕發忠信於天光
蒼水之使稷丘之君庶一問之勺鼎湖而想遺弓履河
洛而思聖勲也孝廉曰山川形勝固足以廓子耳目昌
子文辭然非至焉子毋徒取則於太史遷也更請大之
文學曰去聖逾遠學術紛披控名責實禮度是師上下
有叙隆殺異宜苛察繳統弗失絲釐貴儉兼愛上賢右

鬼采掾不斲型蓋唯土嗇然自守與孔齊軌權事制宜
詭行遁辭移陰轉陽入神出奇變化闔闢千目莫窺秉
要執本立為經制法無常形事無成勢洞究羣情為萬
物主儀節或愆峻刑弼之肅如晨霜犯者裂肌伸鞅非
到挾之以馳因彼天時以施教令若儀若象測度以定
紀綱載明是謂大順食天所寓邦本所資山澤平地相
厥攸宜八政之首著于經彞揣摩國紀宣明帝治或合
或兼本末畢具凡有猷為罔越憲制若是喧飀駭焱迅

雷震撼乎四極充斥乎九垓淪淪乎海水起立而應龍
天飛也彘彘乎五兵雜陳而神授握機也芒芒乎曠野
萬里而列井布碁也走欲徧索其說而試之不識可乎
孝廉曰夫子沒而微言絕諸子百氏人人殊未有能一
之者也文學曰戡定惟武亦國之程其書漫衍四類是
繩陰陽權謀伎巧勢形其目昉列繡繡續續九宮八門
六甲五神軍軌兵鈴星式雷經金鷄玉狗風角鳥情制
器尚精動合神機胄鎧羅陳戈戟交施渠答距堙驚冥

扶胥象車雀舌行馬飛鳧武衡大櫓驪耳長及雲火萬
炬渾脫全軀策全器良其用益張營寨六形旗按五方
天地定位風雲流行龍虎騰趨鳥蛇翼驤正正奇奇巍
巍堂堂赫赫赳赳稜稜璜璜以守則固以擊則揚或追
北於函谷或喋血於太行或徇地於臨菑或陷堅於昆
陽是亦英雄之壯觀也走竊樂之不知饑渴之在已也
孝廉曰兵者不祥之器聖人不得已而用之子服儒衣
談儒書又焉用爾為文學曰粵厥軒轅游心太初上超

鴻沆下入渺瀰有竊其餘亦神其軀文賓履生師皇馬
醫玉柱丹砂騎鳴龍師木羊葛由神泉鹿皮折足山圖
赭衣服閭女九素書赤斧碧鷄朱璜瘕脫玄俗質虛心
存冲寥跡亦倜奇五性既絕九患亦除三階有嚴七變
無虧身升紫宮位紀琳書陰隆伏骨目炯四規執東象
之玉文契九赤之班符御躋虛之龍韞服太極之麟芝
入火不爇入水不濡入石不闕入木不拘雲臥天行神
潛靈飛是蓋與天為徒又不特致治於無為也當闢我

石室寢我世機服我胎息殺我蟲尸洗伐我毛髓銷解
我膚肌覩銅狄而摩挲約令威而來歸不知能成其志
否乎孝廉曰聖人不師仙使其可為則周孔為之矣文
學曰荒荒遺文或偽或真學徒巧辨或正或舛先出者
埋後出者存何老生怨尤而異師是嗔藏之名山編簡
乃完何傳授有緒而魚魯或殘汲冢一啓蟲書再覩何
怪言放紛而弗齊于古緯候相傳內學是尊何列國寶
書而盡閱其文僭辭竊義聾俗簧世日新月巧動莫之

制衡錯樞瑩方州部家何立言艱深而莫究津涯始生
終通生育及資何其象不一而數皆九為原熒州冢名
性氣體何圖指倂殊而重摹迭擬觸類而言何莫非此
沾沾動喙徒見其鄙走將鉤其龐鴻掠其纖微懸空明
之金鑑俾無遁於妍媸能若是是亦足矣孝廉曰此粗
近之然殫於傳註童習白紛若華蟬死生其間亦奚益
哉文學曰孟軻氏沒世乏真儒師師萌廢俚俚奚歸孰
廓我矚孰砭我愚羣言孔多契真者誰欲操腐艦以泛

具區欲絡盲象以駕鼓車縱有智巧寧不殆而嗚呼噫
噫一何寥乎九聖之神於昭于天九聖之心存之於文
又何昭乎嗚呼噫噫噫噫噫噫盈室何有芳蓀繁星爛宵孰
知朝暾寧不使我怡怡而慆慆乎帝降民衷德與天一
胡不自貴葩藻是溺顛倒首足淆混白黑棄其瓚槃寶
厥瓦鬲拊膺自傷淚血交積誓副宿穢以剗未習駕春
陵以為舟鼓關洛而為檝張武夷以為颿期洙泗之可
涉夙興夜寐惶惶業業凜然如上帝之在目睫若是何

如孝廉曰此僕素昔之所究心者也幸與子同之於是
執手降臺相視而笑笑已繼之以歌曰真儒不生世陰
陰兮槌埴索塗愈幽深兮炯其靈根無古今兮超彼九
玄離濁氣兮攀淵追騫乘赤麟兮文之興喪資以自
兮任重道遠何時而止兮朝斯夕斯相期於歿齒兮

文訓

王禕

華川王生學文於豫章黃太史公三年而不得其要俵
俵焉食而不知其味皇皇焉寢而不安其居望望焉如

有求而不獲也太史公一日進生而訓之曰子之學文
有年于茲志則勤矣吾聞天地之間有至文焉子豈嘗
知之乎夫雲漢昭回日星宣朗煙霞卷舒風霆鼓蕩者
天文之所以暢山嶽錯峙江河流行鳥獸蕃衍草木茂
榮者地文之所以成天地之文不能以自私誕賦於人
人則受之故聖賢者出以及瓌人峻士相繼代作莫不
大肆於厥辭蓋自孔氏以來茲道大闡家修人勵致力
於斯其間鞠明究曠疲弊歲月剋精竭思耗費簡劄

者紛趨而競馳孰不欲爭裂綺繡平攀日月高視萬物
之表雄峙百代之下卓然而有為然而躑躅而不進骯
骯而不振思窮力蹙吞志而沒者徃徃而是而能登名
文章之錄者其實無幾則所謂至文者固夫人所罕知
是故文有大體文有要理執其理則可以折衷乎羣
言據其體則可以剴裁乎衆製然必用之以才主之以
氣才以為之先驅氣以為之內衛推而致之一本於道
無雜而無蔽惟能有是則統宗會元出神入天惟其意

之所欲言而言之靡不如其意斯其為文之至乎凡吾之
說予豈嘗知之苟知之其試以語我生曰文之為物貴適時
好粲然相接合喜投樂有如正始不完文氣遂偏俗尚化
遷而排偶之習興焉四屬六比駢諧儷聯抽黃對白調朱
施鉛五采相宣八音相便握摘穠纖吟哢寒暄豐腴醲酎
眩麗媚妍珠璣溢緘膾炙滿篇凡慶函與賀牘咸累幅而
疊番王公之門下逮閭閻彛儀縟典往來交際率奉之以周
旋又如大雅既遠詩歌日變玉臺西崑其流也漸支為詞

曲爭嫩競艷字分重輕句協長短浮聲切響清濁和間
羽振宮潛商流徵泛笙簧觸手錦繪迷盼風月留連鶯
花淩亂振妙韻於沉寔託葩辭於清婉性情因之而暢
宣光景因之而呈獻好會睽離歡忻悲歎莫不假是以
託情固無間於貴賤也若是者其為文何如太史公曰
古語變而四六古聲變而詞曲文之弊也甚矣請置勿
道為言其他生曰命卿選士之法廢而科舉乃興以文
取士設為範程漢有射策唐有明經復有詩賦逮宋日

益增經行為義而三篇以明賦本於律而八韻以成成
各專其科各精其能其義則意融旨切言粹辭達枝語
蔓引叢論英發剡聖秘而立辨幹天機而生說其賦則
句鍊字憂音覈韻軋藻秀春擷花艷晴掇校妍醜於錙
銖品抑揚於毫髮他若宏辭制舉大科別設文法靡不
該文格罔弗列文必學稱博極才號閎傑乃能攻其業
凡習於斯者皆賈勇詞場角雄藝闔不厲兵而白戰爭
奪孤而先拔若工若拙三年是力若勝若劣一日而決

及其中文衡入文彀則遂圍棘聲徹榜金名揭上賢書
於天府承洪恩於帝闕乃躋膺仕乃展遐轍若卿若相
鮮不由茲而出矣上以此而求賢士以此而致身文之
用世信不可誣也歟太史公曰科舉之文趨時好以取
世資特干祿營寵之具耳學古之君子恥言之生曰文
之古者登諸金石記誌頌銘具有成式或鐘鼎是勒或
琬琰是刻或鐫于麗牲懸緯之碑或鐫在封嶽磨崖之
壁莫不炫耀崇勲烜焯茂德載丕丕之嘉猷紀赫赫之

休績雖皆一筆之力九鼎可扛一字之價千金是直爾
其宏奧之思雅健之姿瑰瑋之辭擔撫馬班凌厲蔡陳
蹂躪韓柳玉米金聲焜焜煌煌鉤鉤鏘鏘袞章繡紋炳
炳煒煒續續紘紘詭然而蛟龍翔蔚然而虎鳳昂翕然
而律呂張正音諧醴醖變體類雲霆勁氣排甲兵沈冥
以之而開豁幽閔以之而著宣逖遠以之而綿延然非
儒林宗匠藝管宿將道德為世之模楷名位為國之儀
望堂堂焉章章焉擅鴻筆攬魁柄稱文章之大家者孰

當仁而不讓宜其媲美古昔傳信今後照四裔以無倫
垂千載而不朽此其為文也不幾於古乎太史公曰文
至於是謂之古宜也雖然其為用殆不止是已生曰朝
廷之上有巨文焉典謨誓誥制冊令詔藹為王言渙為
大號而帝王之制作存焉灝灝噩噩渾渾洋洋凌厲蓬
字揮霍奮揚或溫潤而精粹或宏偉而秀雄或嚴肅而
簡重或衍裕而深長經緯天地橐籥陰陽黼黻萬化轆
轤三光封職則氣含陰雨之潤授官則義炳重離之明

敕戒則吐星漢之華治戎則揚游雷之轟肆赦則垂滋
於春露明罰則示烈於秋霜一字之褒沛漏泉於下地
一言之感被挾纊於黎蒸朝出九重暮行四方如風動
而草偃如山鳴而谷應奮迅乎寓外旁薄乎域中鼓舞
乎華夏陶鎔乎帝皇文章之用蓋與造化而侔功矣若
是何如太史公曰易曰王言如絲其出如綸詩曰辭之
輯矣民之洽矣辭之懌矣民之莫矣文之為用誠莫盛
於此矣姑舍是豈無復有可聞者乎生曰文之難者莫

難於史故良史之才古今或無皇道帝德王畧霸圖運
祚興衰治道隆污將相卿士武烈文謨賢智忠孝兇慝
姦諛天文五行地理河渠禮樂兵刑食貨賦租選舉職
官冕服車輿雕題鑿齒遐方異區恍惚詭變俗怪習殊
凡一代之本末皆載乎史故曰史者一代之成書是故
事以實之辭以給之法以立之例以律之作史之要必
備乎此然非其能足以通古今之體明足以周萬事之
理智足以究難知之意文足以發難顯之義者曾烏得

以稱良史蓋自紀表志傳之制馬遷創始班固繼作綱
領昭昭條理鑒鑒三代而下史才如二子者可謂特起
拔出俊偉超卓後之為者世仍代襲率莫外乎其槩夔
論者以為遷固之書其與善也隱而彰其慝惡也直而
寬其樹義也簡而明其防僭也微而嚴是皆合乎聖人
之旨意而非庸史之敢干及乎蔚宗承祚之流則遂肆
意妄纂曲筆濫箋曖昧其本旨而義駁以偏破碎其大
體而辭謏以纖况乎范陳之不若者則又畧陋而無足

觀矣故史所以明乎治天下之道而為之者亦必天下之才然後勝其任茲其所為難乎太史公曰噫史之為文誠難乎其盡美矣文而為史誠極天下之任矣抑吾聞之文有二有紀事之文有載道之文史者紀事之文於道則未也生曰聖人既歿道術為天下裂諸子者出各設戶分門立言以為文是故管夷吾氏以霸畧為文鄧析門以兩可辨說為文老聃氏以兼要執本持謙處卑為文列禦寇氏以黃老清淨無為為文墨翟氏以貴

儉兼愛上賢明鬼非命上同為文公孫龍氏以堅白名
實為文莊周氏以通天地之統序萬物之性達死生之
變為文慎到氏以刑名之學為文申不害氏韓非氏復
流於深刻之文尹文氏又合黃老刑名為文鬼谷氏以
捭闔為文蘇秦氏張儀氏因肆為縱橫之文孫武氏吳
起氏以軍形兵勢圖國料敵為文荀卿氏揚雄氏則以
明先聖之學為文淮南氏則以總統道德仁義而蹈虛
守靜出入經道為文凡若此者殆不可遽數也雖其文

人人殊而其於道未始不有明焉譬猶水火相滅亦以相生和敬相反亦以相成易所謂天下一致而百慮同歸而殊塗者言本於一揆而已文以載道其此之謂乎太史公曰諸子之文皆以明夫道固也然而各引一端各據一偏未嘗窺夫道之大全人奮其私智家尚其私談支離頗僻馳騁鑿穿道之大義益以乖大體益以殘矣此固學術之弊而道之所以不傳也生曰聖人之文厥有六經易以顯陰陽詩以道性情書以紀政事之實

春秋以示賞罰之明禮以謹節文之上下樂以著氣運之虧盈凡聖賢傳心之要帝王經世之具所以建天衷奠民極立天下之大本成天下之大法者皆於是乎有徵斯蓋羣聖之淵源九流之權衡百王之憲度萬世之準繩猶之天也則昭雲漢而揭日星布烟霞而鼓風霆猶之地焉則山嶽峙而江河行鳥獸蕃而草木榮故聖人者參天地以為文而六經配天地以為名自書契以來載籍以往悉莫與之京斯其為文不亦可以為載道

之稱也乎太史公韞然而驚喟然而嘆曰盡之矣其蔑
有加矣此固載道之器而聖人之至文矣嗟乎世之學
者無志乎文則已苟有志焉舍是無以議為矣是故本
之詩以求其恒本之易以求其變本之書以求其質本
之春秋以求其斷本之樂以求其通本之禮以求其辨
夫如是則六經之文為我之文而吾之文一本於道矣
故曰經者載道之文文之至者也後聖復作其蔑以加
之矣今子知及乎此則於文也其進孰禦焉特在加之

意而已矣生於是再拜謝曰謹受教敢不拳拳服膺是則是效以無忝夫子之訓告

巢雲對

貝瓊

淮南蘇恒屋于千仞之厓危乎孤鶴之託一枝而雲氣出入乎戶牖與野馬絪縕不絕遂號巢雲而處其中凡若干年人莫得見之者有東吳生涉江而過焉恒方據槁梧讀老子書因介而進曰甚矣子之好古也自上棟下宇之作以辟風雨寒暑人固別乎鳥獸已謂之巢者

假也又謂之巢雲者蓋假也吾嘗病世之假不知好古之士亦必假之物而為名則彼之困於假者奚病也抑顯晦之跡既殊而憂樂之情懸絕吾請與子論之可乎且以觀吾子之所擇也曰可曰通都之中左回大川右屬羣山宛宛下赴鬱鬱龍蟠甲第是營繚以崇垣楹之約之如跂如騫文憲洞開朱栱鈎連盤盤囷囷仰不見天以居以寢其居孔安不火冬熾無冰夏寒其視巢雲為何如對曰揚子有言曰高明之家鬼瞰其室不能節

之以制而侈靡相傾此漢之田蚡梁冀卒蹈大禍曾不
及覆茨之為貴也吾惡為哉曰下隰高原我圃我樊輦
石其間可游可觀鑿而成窪壘而成塚錯落星布嵌巖
雲涵或背而崩或環而拱虎豹縱橫駝馬交踵神侔擘
華勢方斷隴境與心謀物以機動異卉駢生脩條上竦
回飈激芳紅褰翠湧其視巢雲為何如對曰金谷既虛
而二十四友為禽宜來者之所戒復忍襲其轍乎曰高
臺九層上切星辰俯見百里極乎八垠洞庭為池浩浩

沄沄鳬鷺往來候鴈千羣霜降之秋雷奮之春以宣其
壅以泄其煩朝挹羲和夕賓結隣其視巢雲為何如對
曰古者國有時臺以望氛祲察其豐凶若章華姑蘇恒
勞民為之而勢危累棊者君子不予也矧其下者罄千
金以奉一已樂之所在患必隨之曰鳳吹參差柱促絃
張乍抑乍揚移宮變商楚腰衛頰二八分行曲按回波
鸞停鵲翔揚蛾聯娟吐氣蘭芳良夜何其厭厭未央絕
纓繼懽炳燭傳觴其視巢雲為何如對曰孔子曰鄭衛

之音比於慢矣吾自吳之越自越而楚而息於此耳莊
生之天籟發蘇門之嘯歌顧不愈乎世俗之好以喪吾
真邪曰結友金張連姻衛霍車馬相過氣熾熏灼恥事
佔畢擊丸六簿遨遊狹邪宿留平樂百金一擲割鮮野
酌杯觀五湖垠視四嶽其視巢雲為何如對曰鄙哉貴
游子弟席奕葉之寵矜其驕豪荒淫無度故積之百年
之久而墮於一旦不亦悲夫曰入黃閣趨紫垣理萬民
總百官令出如流勢尊如山門列霜戟堂垂曲旂魚鱗

初啟鶴蓋雲團左右之人衣襲綺紈祿周三族國延子
孫流光百代比德前人其視巢雲豈不有間乎對曰以
非常之才處非常之任者吾絜知校能奚翅鵬鷖之相
萬又可以妄覲之邪苟居其位必不克矣曰然則與雲
卷舒一壑一邱擷秀汲清委化而休非幾於潔身亂倫
之流歟對曰生覩於彼而不覩乎此蓋知其一而不知
其二也雲之為物圓于天地而有時不足圓也藏於山
澤而有時不足藏也汎濫如濤洶乎其不可排也回旋

如雪泯乎其不可執也蔽乎內外為吾之藩籬也彌乎六合為吾之帷幄也其變不一吾之玩也若狎而昵吾之友也茫茫然莫知其所止油油然莫測其所如也於是拉弘景招太白小匡廬卑少室逍遙徜徉以永朝夕視彼壯麗之居非吾之所安閒曠之圃非吾之所適馳騁非吾之所事聲伎非吾之所惑而一時赫赫遠近承風未若終吾天年而守其寂寂也東吳生恍焉若失迺為之歎曰吾子可謂不屈於天下之物而特假以見其

志則凡世之沉溺者惡覩物之過乎前其猶太空之雲
乎遂錄其對

却巧文

王 達

昔柳儀曹曾製乞巧文千載之下有鐵厓亦常擬之
矣余讀二先生之文感而作却巧文并窺管見其敢
追踵前賢哉姑自釋其抱耳

歲惟壬辰七月之七王子潛居江江弗憚適冷風颯然
月綻雲拆桐籟薦秋露花凝夕有一嬋娟歛莅吾席析

析步搖灩灩繁飾睨王子而言曰吾天女之孫也職司
天巧式利下民禱吾者泰背吾者屯趨吾者富違吾者
貧吾久聞子多慙少文吾實恤子來濟子身汝或不憚
吾悲汝陳王子疎然歛踵覲覲志志似夢非夢謂神非
神蒲伏而言曰臣固拙矣敢不願聞天孫整裾端坐憮
然曰噫人生兩間孰弗冀通今子弗克巧進自貽醜窮
不師詭遇祗業專攻末塗尊沓厖言滋豐技夸鬼蜮計
逞狙公鳥翼蛇驤蜂聚蟻同託根魏柯名曰宛童俾不

曲合焉致斯崇路欺握雉祝天祛蟲陽縱陰戢內傾外
融憎陋忻嬖人心攸同聾俗簧世謫行迂蹤季子繇是
而貴曲逆由是而封子不聞歟矧乎妙奪工倕紆行曲
施能若是者庸無不宜前邀後障左繩右規笑浣薇露
戲焚玉蕤錦心繡腹侮書嫚詩啟喙成訟轉趾微疵予
予奪奪是是非非顛倒縱橫起滅提挈倚天拔地斷蛟
刺犀藻葩綴縟陟降驅馳氣劇屈子目短相如諸侯見
構豪族爭儲壹譽可喜壹毀可悲致顯若彼汝奚不為

今子譏吃齷顏沉吟支頤窮鄉僻地運日以奇我今告
汝汝應諦思汝不改轍馬能救而夫騏驥捕鼠弗逮狂
狸吾將錫子語甯助子嘲機納子之黠驅子之癡詎不
偉哉王子曰臣聞駑馬安步麒麟跼蹐各有攸得奚憫
奚惡良玉渾然烏事刻琢馬安善宦倪寬樸學寧為拙
傷毋為巧詆岐塗術異彼此相角沾沾求容栩栩強語
手擎足旋神辱志沮我嗟其人汨此靈府命栖險竿躬
星游弩蒿目蓬心臣實不取天孫噱然笑曰井蛙不見

東海螭蛄不知春秋弗識宜樞弗察芳猷方枘圓鑿事
恒弗投毀方瓦合情不知謀耳與目敵心與身讐么麼
之技自矜寡儔汝不思變吾實汝羞汝今絳宮弗懲王
堂弗憂攻苦數澹厄如楚囚匪徒恥之吾實悲之也匪
徒悲之吾實悼之也王子又蒲伏而謝曰天孫之心固
仁矣啟臣之智固備矣然強哭者雖疾不哀強歡者雖
笑不妍生龜脫筍顧非自然危鶴斷脰乃違厥天機械
藏心神德不全夫巧者言拙者默巧者勞拙者逸巧者

賊拙者德巧者凶拙者吉此先正之格言敢弗服膺而
警惕於是天孫嘉然冥逝茫無所得出門視之但見繁
星麗天萬里一碧

翰墨林七更有序

金寔

翰墨林者永嘉謝君廷循圖書之府也君以和粹謹
飭被眷遇得美名於縉紳間藉甚性嗜清玩畜之頗
富嘗名其齋曰米家船少傅東里楊先生士奇易以
今名而記之予乃為作七更極其辨以進於道意劣

辭庸視古之作者固未免有捧心之誚要之發乎情
止乎禮義庶幾而不差者也

覺非先生久客關關心厭喧囂怔忡堙鬱思若無聊安
得絕境於焉逍遙滌濯煩襟以永今朝聞永嘉主人有
翰墨之林曳杖彳亍若履空谷足音跂然主人出速不
言心喻盼睐以目升自賓階少叙寒燠主人曰噫走也
是林不資一地匪穹于岑無松之盛非栢之森駢羅圖
書錯置瑟瑟几萬籤上下古今文房百玩觸手可尋

少安無躁願陳至音於是拂几正席焚沉蕕蕙緩宮急羽高卑以序巍巍洋洋無不如意長清短清猗蘭飛佩五曲九引纚纚可繼先生曰美矣哉太古之聲也然鍾期既亡伯牙絕響箏篴之耳未能得其惝恍毋勞爾為也主人曰唐虞至聖子不得與記物設教啟其聾瞽以局必方象地之則以道必正神明其德有白有黑曰陰與陽互陳錯舉雲漢其章防危補罅料敵審已負不可值勝不可恃兩雄相值乃見勍敵龍蛇成陣虎豹堅壁

雖曰小數有至理焉無所用心為之亦賢先生曰君子不
操勝心毋作機事此孤山處士所以鄙之也願聞其他
主人曰書契初成鳥跡茫昧科蚪再變乃有分隸斯邈
之下鍾王軼出唐臨晉帖如蹈一律狂僧顛史草聖入
神蘇黃米蔡各自絕倫真跡間存初刻咸在點畫使轉
折旋向背明窻淨几目玩心醉誠一快也先生曰儒者
於書固最近事然一好著亦能喪志吾未暇焉主人曰
五色作續肇自姚姒後世因之畫事由始晉唐以降好

尚蠹起顧吳荆關董郭王李入神造妙區別品第耽嗜
成僻千金莫以芳播清流貴動丹宸適情游藝動合玄
理宣和纂錄寶鑑有史似不可少也先生曰君子寓意
於物而不可留意於物此先賢所以恐其泥也敢請大
之主人曰陶寫性靈妙在得句物情人境動合天趣模
擬之精推敲之至晝或忘餐宵恒失寐窮極彌工思靈
愈異神驚鬼泣造物所忌我思古人高不可企先生曰
風雅遼闊正聲微茫競趨靡麗大樸日亡安得擊壤以

反渾厖主人曰經緯天地轆轤後先用與政通體隨世
遷秦漢雄深齊梁駸駸韓公倡唐衰弊特起歐蘇曾王
鳴宋之盛及今賴之矩矱由正今之作者秀出如雲昭
回河漢炳耀星辰鈞天合奏鸞鳳和鳴山輝玉蘊淵媚
珠呈走將漱其芳潤咀其英華寤寐于茲林之下不知
歲月之虛盈也若是如何先生曰近之矣而猶未也文
以載道匪惟辭工上師聖人吾將子從主人憮然曰命
之矣聖人之言世謂之經囊括宇宙含煦生靈未暇細

論畧陳其名易備陰陽造化以明書言政事治功乃成
感發懲創詩本性情無序不和禮樂由興春秋撥亂王
法權衡學庸論孟規矩準繩猶如菽粟布帛之征一息
不繼民不得生浮文勝質奚利攸行走將膏吾車秣吾
馬由伊洛以遡洙泗而履吾夫子之庭不知其不可也
先生離席而立降階頰首請先羣經旁藝居後以翰墨
林為道淵藪

明文衡卷二十二